

Na osnovu člana 93.stav 2., i člana 95. stav 3. Zakona o zaštiti okoliša ("Službene novine Federacije BiH", broj 33/03), federalni ministar okoliša i turizma donosi

PRAVILNIK

O EKO-OZNAKAMA I O NAČINU UPRAVLJANJA EKO-OZNAKAMA

Član 1.

Ovim Pravilnikom se propisuju način izrade i odabira eko-oznake, uslovi i postupak za dobijanje i način dodjele eko-oznake.

Član 2.

Eko-oznaka je znak zaštite okoliša koji se dodjeljuje na osnovu utvrđenih kriterija, uz sudjelovanje stručnjaka i javnosti prema precizno utvrđenom postupku, a odnosi se na kvalitet sa stajališta zaštite okoliša tokom cjelokupnog životnog ciklusa i označava onaj proizvod koji u odnosu na srodne ili iste proizvode ima smanjeni utjecaj na okoliš.

Član 3.

Eko oznaka se može dodijeliti proizvodima i uslugama široke potrošnje, osim prehrambenim proizvodima, pićima i farmaceutskim proizvodima, u skladu s proizvodima definisanim eko-označavanjem u Evropskoj uniji.

Član 4.

Ministar Federalnog ministarstva okoliša i turizma (u daljnjem tekstu: ministar), će raspisati konkurs u cilju odabira odgovarajućeg grafičkog rješenja eko-oznake.

U tu svrhu ministar će formirati Komisiju za pripremu konkursa i odabir grafičkog rješenja eko-oznake (u daljnjem tekstu: Komisija za konkurs).

Član 5.

Federalni ministar će svojim aktom proglasiti usvojenu eko-oznaku i to objaviti u "Službenim novinama Federacije BiH".

Grafičko rješenje eko-oznake će biti sastavni dio ovog Pravilnika.

Član 6.

Ekološki proizvodi moraju biti označeni eko-oznakom prije stavljanja u promet. Označavanje ekoloških proizvoda eko-oznakom obavlja proizvođač u ekološkoj proizvodnji.

Nanošenjem eko-oznake garantuje se da je proizvod bio stručno nadziran i da je potvrđen na propisan način u skladu sa članom 95., stav 2. Zakona o zaštiti okoliša FBiH.

Član 7.

Postupak za dobijanje eko-oznake pokreće se podnošenjem pismenog zahtjeva za dodjelu eko-oznake (u daljnjem tekstu: Zahtjev) koji proizvođač podnosi Federalnom ministarstvu okoliša i turizma.

Zahtjev mora sadržavati:

- ime/naziv i adresu proizvođača
- naziv proizvoda za koji se traži dodjela eko-oznake

- upisni broj iz pripadajućeg registra
- opis tehnološkog procesa
- opis tehnoloških izmjena, energetske poboljšanja, te izbora sirovina s ciljem povoljnijeg uticaja na okoliš
- usporedbu s drugim istim ili sličnim proizvodima na tržištu Bosne i Hercegovine
- certifikat o kvalitetu proizvoda
- sigurnosno - tehničke liste proizvoda i sirovina prema evropskim smjernicama
- vodnu dozvolu
- okolinsku dozvolu
- podatke o potrošnji prirodnih resursa
- opis načina zbrinjavanja otpada.

Član 8.

Prijedlog za dodjelu eko-oznake utvrđuje Komisija za dodjelu eko-oznake (u daljnjem tekstu: Komisija) na osnovu zahtjeva od strane proizvođača i prema potrebi stručnog mišljenja od strane stručne institucije za relevantnu oblast.

O svom prijedlogu Komisija upoznaje ministra u izvještaju za svaki pojedinačni zahtjev, sa odgovarajućim obrazloženjem. Uz izvještaj Komisija dostavlja ministru prijedlog ugovora o dodjeli eko-oznake (u daljnjem tekstu: Ugovora).

Ugovor treba da sadrži sve elemente kojima se uređuju međusobna prava i obaveze u predmetu dodjele eko-oznake.

Član 9.

Komisiju s mandatom od četiri godine imenuje ministar. Komisija ima 5 članova.

Komisija radi i odlučuje na sjednicama. Komisija donosi poslovnik o radu i uspostavlja kriterije za obračun troškova obrade zahtjeva i naknada za eko-oznaku.

O radu Komisije vodi se zapisnik.

Član 10.

Proizvodi kojima se dodjeljuje eko-oznaka razvrstani su u skupine proizvoda.

Za svaku skupinu proizvoda primjenjuju se posebna mjerila koja vrijede u Evropskoj uniji i kojima je potrebno udovoljiti da bi neki proizvod mogao dobiti eko-oznaku

Član 11.

Prijedlog za utvrđivanje nove skupine proizvoda mogu podnijeti proizvođači, potrošači, udruge za zaštitu okoliša i ostali zainteresovani.

Član 12.

Skupine proizvoda i posebna mjerila utvrđuje i usvaja Komisija na osnovu ovog Pravilnika, mišljenja stručne institucije i rezultata javne rasprave.

Posebna mjerila za dodjelu eko-oznake vrijede samo za određeni period.

Član 13.

Komisija može od proizvođača tražiti dopunu zahtjeva, ako isti ne sadrži sve podatke iz člana 7. ovoga Pravilnika, i dodatne podatke ako su potrebni za donošenje odluke o dodjeli eko-oznake.

"Službene novine Federacije BiH", br. 92/07

Član 14.

Proizvođač može, ako procijeni da su pojedini podaci o proizvodu poslovna tajna, uz obrazloženje zatražiti da podaci budu dostupni samo Komisiji i stručnoj instituciji.

Komisija i stručna institucija su dužni čuvati poslovnu tajnu koja im je povjerena u postupku dobijanja eko-oznake.

Član 15.

Komisija može zatražiti stručno mišljenje jedne ili više stručnih institucija tokom postupka dodjele eko-oznake.

Stručno mišljenje, da li proizvod zadovoljava uslove za dobijanje eko-oznake, izrađuje se na osnovu analize uticaja proizvoda na okoliš u cjelokupnom životnom ciklusu proizvoda.

Član 16.

Eko-oznaka dodjeljuje se najduže na period od četiri godine.

Član 17.

Ukoliko Komisija utvrdi da, proizvod ili usluga u ugovorenom periodu na koji je dodijeljena eko-oznaka prestane zadovoljavati uslove na osnovu kojih je dodijeljena, predložiti će ministru raskidanje Ugovora.

Član 18.

Ministar izvještava javnost o dodjeli i oduzimanju eko-oznake putem javnog saopštenja.

Član 19.

Ovaj Pravilnik stupa na snagu osmoga dana od dana objave u "Službenim novinama Federacije BiH"

Broj 04-02-2306/07
4. decembra 2007. godine
Sarajevo

Ministar
dr sc. **Nevenko Herceg**, s. r.